

---

## CAIS AM DDYFYNBRIS

---

### ASESIAD O'R DDARPARIAETH ADDYSG ÔL-16 BRESENNOL YNG NGWYNEDD

#### 01. Cyflwyniad a chrynodeb

01.1 Mae Adran Addysg Gwynedd yn dymuno penodi unigolyn neu sefydliad cymwys i ymgymryd ag asesiad cynhwysol traws sirol o'r ddarpariaeth addysg ôl-16 yng Ngwynedd. Mae'n bosibl y bydd canfyddiadau yr asesiad yn sail i drafodaeth bellach ar lwybr y ddarpariaeth ôl-16 yn y sir i'r dyfodol.

#### 02. Y Cefndir

02.1 Yn hanesyddol yng Ngwynedd roedd gan bob un o'i 14 ysgol uwchradd chweched dosbarth a oedd yn darparu cyrsiau Lefel A i bobl ifanc Gwynedd. Roedd y pynciau craidd yn cael eu cynnig ym mhob ysgol ac roedd y cynnig ehangach yn ddibynnol ar arbenigeddau ac amserlen pob sefydliad unigol. Prin iawn oedd y teithio rhwng ysgolion.

02.2 Yn y 1990<sup>au</sup>, bu newid mawr i'r ffordd yr oedd addysg ôl-16 yn cael ei darparu yn Nwyfor a Meirionnydd yn benodol. Diddymwyd dosbarthiadau 6ed yr ysgolion uwchradd yn yr ardaloedd hyn (ar wahân i Ysgol y Berwyn) a sefydlwyd coleg trydyddol lle'r oedd y disgyblion yn trosglwyddo iddo ar ddiwedd eu haddysg statudol yn 16 oed. Ni fu unrhyw newid i'r ddarpariaeth ôl-16 yn Arfon yn yr un cyfnod.

02.3 Mae'r ddarpariaeth ôl-16 sy'n weithredol yng Ngwynedd **ar hyn o bryd** yn cael ei darparu mewn chwe ysgol uwchradd yn Arfon sef Ysgol Brynrefail, Ysgol Dyffryn Nantlle, Ysgol Dyffryn Ogwen, Ysgol Friars, Ysgol Syr Hugh Owen ac Ysgol Tryfan, ac mewn dau goleg addysg bellach sef Coleg Menai (Bangor) a Choleg Meirion Dwyfor (Pwllheli a Dolgellau) sy'n rhan o Grŵp Llandrillo Menai. Mae chweched dosbarth hefyd yn Ysgol y Berwyn, Y Bala.

02.4 Ymhellach, mae ysgolion uwchradd Arfon mewn partneriaeth gydag ALI Gwynedd, ysgolion uwchradd Môn ac ALI Môn a Grŵp Llandrillo Menai yn ffurfio Consortiwm (Consortiwm Addysg ôl-16 Gwynedd ac Ynys Môn) sy'n gosod cwricwlwm ôl-16 yr ardal drwy drefniant partneriaethol. Mae hyn, ymysg pethau eraill, yn galluogi'r ysgolion i gyfarch *Mesur Dysgu a Sgiliau (Cymru) 2009* sy'n nodi bod yn rhaid i bob sefydliad ôl-16 gynnig 30 dewis o ran cyrsiau i ddysgwyr gyda phump o'r rheiny yn gyrsiau galwedigaethol.

#### 03. Nod yr asesiad

03.1 Mae Adran Addysg Gwynedd yn awyddus i gomisiynu adroddiad sy'n dadansoddi darpariaeth bresennol ôl-16 y sir yn ei chyfanrwydd. Golyga hyn edrych ar y ddarpariaeth bresennol o fewn y sir i gyd gan ddwyn cymariaethau rhwng rhinweddau y darpariaethau gwahanol sy'n weithredol ar hyn o bryd.

03.2 Amcan yr astudiaeth yw edrych yn benodol ar:

- y trefniadau llywodraethu sy'n weithredol ar hyn o bryd
- y dewisiadau sydd ar gael i bobl ifanc yng Ngwynedd
- y cyrsiau sydd ar gael, i gynnwys addysg gyffredinol, alwedigaethol a phrentisiaethau ac unrhyw fylchau yn y ddarpariaeth bresennol
- ansawdd yr hyn sy'n cael ei gynnig yng Ngwynedd ar hyn o bryd
- adnabod rhagoriaethau a gwendidau y ddarpariaeth bresennol
- y ddarpariaeth ar gyfer dysgwyr ADY ôl-16
- cyfrwng iaith y cyrsiau a gweinyddiaeth ganolog y darparwyr
- profiadau pobl ifanc yn y sector ôl-16 yng Ngwynedd
- gwerth am arian a hyfywedd y ddarpariaeth i'r dyfodol

Bydd hefyd angen llunio a gweithredu cynllun cyfathrebu cynhwysfawr i sicrhau ymgysylltu effeithiol gyda phob un o'r rhanddeiliaid allweddol.

## 04. Tasgau i'w cyflawni

04.1 TASG 1 – *Asesu a gwerthuso'r ddarpariaeth bresennol*

Tasg pen desg i edrych ar y ddarpariaeth ôl-16:

- Adnabod a gwerthuso'r isadeiledd presennol yn yr ardal
- Mapio'r cynnig sydd ar gael i ddysgwyr ôl-16 gan gynnwys dysgwyr ADY
- Dadansoddiad o ganlyniadau y gwahanol ddarparwyr dros gyfnod treigl o dair blynedd
- Ymchwilio i ymhle mae rhagoriaethau a gwendidau ar draws yr holl ddarpariaeth ar hyn o bryd
- Adnabod y cyrsiau poblogaidd a'r rhai lleiaf poblogaidd
- Adnabod unrhyw fylchau yn y ddarpariaeth ar hyn o bryd
- Mapio cyfrwng iaith y cyrsiau a dilyniant rhwng CA4 ac ôl-16
- Adnabod y ddarpariaeth orau o safbwynt gwerth am arian a hyfywedd i'r dyfodol

04.2 TASG 2 - *Ymchwilio i farn a dymuniadau rhanddeiliaid allweddol y sector ôl-16:*

Trwy ymgynghori gyda rhanddeiliaid allweddol:

- Cynnal grwpiau ffocws gyda dysgwyr ôl-16 cyfredol a blaenorol y gwahanol ddarparwyr a chael eu barn am y cynnig sydd ar gael iddynt gan roi sylw penodol i'w profiad fel defnyddwyr y gwasanaeth
- Adnabod unrhyw rwystrau a chyfyngiadau yn y ddarpariaeth bresennol

- Canfod barn a phrofiad penaethiaid, cyrff llywodraethol a swyddogion addysg mewn perthynas â'r sector ôl-16

#### 04.3 TASG 3 – *Argymhellion a Sylwadau*

Ar sail y dystiolaeth a gasglwyd gofynnir i'r ymgwymerwr lunio argymhellion a/neu sylwadau ar feysydd sydd angen sylw yn sgil y dystiolaeth a gasglwyd.

#### 04.4 TASG 4 - *Ymchwilio i farn a dymuniadau rhanddeiliaid allweddol y sector ôl-16*

Coladu a dadansoddi'r holl wybodaeth fel rhan o'r comisiwn i un astudiaeth ddwyieithog gynhwysfawr, yn cynnwys atodiadau a chrynodeb gweithredol.

### 05 Allbynnau allweddol a dulliau adrodd

05.1 Gofynnir i'r ymgwymerwr a ddewisir fodloni nod y briff, cwblhau'r holl dasgau a nodwyd i foddhad y grŵp cleientiaid a pharatoi'r canlynol:

1. Cynllun prosiect y cytunir arno gyda'r grŵp cleientiaid
2. Crynhoi a chyflwyno'r holl ddata a gesglir drwy law y comisiwn hwn yn ddeniadol ac yn ddealladwy
3. Adroddiad terfynol drafft, i'w drafod gyda'r grŵp cleient
4. Adroddiad terfynol dwyieithog, yn cynnwys crynodeb gweithredol
5. Copi electronig o'r adroddiad terfynol yn MSWord
6. Cyflwyno'r canfyddiadau gerbron rhanddeiliad allweddol a all gynnwys swyddogion, aelodau etholedig a phenaethiaid.

05.2 Disgwylir i'r cynnyrch terfynol gyflwyno darlun a dadansoddiad manwl a chynhwysfawr o holl ystod y ddarpariaeth ôl-16 yn y sir a allai fod yn sail gadarn ar gyfer unrhyw drafodaethau pellach yn y maes hwn yng Ngwynedd.

05.3 Dylai'r cynnyrch terfynol hefyd fod yn seiliedig ar dystiolaeth gadarn, dibynadwy a di-duedd.

05.4 Dylid cynnwys unrhyw argymhellion a/neu sylwadau ar feysydd sydd angen sylw yn sgil y dystiolaeth a gasglwyd.

05.5 Wrth gwblhau'r uchod, dylai'r ymgwymerwr a ddewisir ganiatáu ar gyfer cyfarfodydd ffurfiol digonol gyda'r grŵp cleientiaid.

### 06 Amserlenni a chyllideb

06.1 Dyma'r amserlen ar gyfer y gwaith.

Dewis contractwr	w/c 12 Mawrth, 2018
Cytuno ar gynllun y prosiect	w/c 19 Mawrth 2018
Adroddiadau drafft	i'w cytuno
Adroddiadau terfynol	w/c i'w cytuno

## 07 Cyflwyno dyfynbrisiau

07.1 Dylai'r dyfynbrisiau a gyflwynir ddangos gwerthfawrogiad amlwg o'r gwaith arfaethedig fel yr amlinellir yn y briff hwn. Dylai'r unigolion neu'r sefydliadau sy'n darparu dyfynbris gynnwys:

- cyfanswm cost a fydd yn cynnwys yr holl dreuliau, cyfieithu a chostau argraffu ar gyfer cwblhau'r gwaith fel yr amlinellir yn y briff heb gynnwys TAW.
- manylion tîm yr astudiaeth, gan gynnwys eu cefndir a'u cyfraniad penodol at yr astudiaeth o ran mewnbwn amser a chyfraddau
- enghreifftiau o brofiad perthnasol
- amlinelliad o sut maent yn bwriadu delio â'r astudiaeth o ran rhaglen a methodoleg
- cadarnhad y bydd y telerau a'r amodau a nodir isod yn cael eu derbyn neu y glynir wrthynt

07.2 Caiff yr ymgeiswyr gyflwyno eu dyfynbrisiau drwy gyflwyno copïau caled a / neu gopïau electronig:

- *Copïau caled:*

Dylai unigolion neu sefydliadau sy'n dymuno cyflwyno copi caled o'u dyfynbris ddarparu 3 chopi o'u cynnig. Rhaid cyflwyno cynigion mewn amlen blaen, nad yw'n dangos dim byd a fydd yn datgelu pwy yw'r ymgeisydd. Ar yr amlen, dylid nodi yn glir, 'Cyfrinachol - Ymateb i gais am ddyfynbris: ASESAD O'R DDARPARIAETH ADDYSG ÔL-16 BRESENNOL YNG NGWYNEDD' a'u hanfon at:

Garem Jackson  
Pennaeth Addysg Gwynedd  
Cyngor Gwynedd  
Swyddfeydd y Cyngor  
CAERNARFON  
LL55 1SH

- *Cyflwyno'n electronig:*

Dylai unigolion neu sefydliadau sy'n dymuno cyflwyno eu dyfynbris yn electronig ddarparu eu cynigion ar fformat MS Word 2003, RTF neu PDF. Ym maes pwnc yr e-bost a anfonir dylid rhoi 'Cyfrinachol - Ymateb i gais am ddyfynbris: ASESAD O'R DDARPARIAETH ADDYSG ÔL-16 BRESENNOL YNG NGWYNEDD', a'i hanfon at:

garemjackson@gwynedd.llyw.cymru

07.3 **Rhaid i'r dyfynbrisiau gyrraedd erbyn hanner dydd 26 Chwefror 2018 fan hwyraf.** Mae'r dyddiad cau hwn yn derfynol ac ni ellir ei ymestyn; ni chaiff cyflwyniadau a fydd yn cyrraedd ar ôl yr amser hwn eu hystyried.

07.4 Ni fydd Cyngor Gwynedd yn ad-dalu unrhyw gostau sy'n gysylltiedig â chyflwyno ymateb ar gyfer y cais hwn am ddyfynbris.

## 08 Dewis a phenodi

08.1 Gofynnir i'r dyfynbrisiau a gyflwynir ddangos yn glir y gweithgareddau a'r costau a gynigir a'r cyfiawnhad drostynt. Asesir ansawdd ar sail cyflwyniadau ysgrifenedig sy'n dangos arbenigedd, dull gweithredu cadarn a gwerth am arian. Mae'r cleientiaid wedi ymrwymo i sicrhau gwerth am arian ac nid ydynt wedi ymrwymo i dderbyn y dyfynbris isaf nac unrhyw ddyfynbris a gyflwynir. Caiff cymhareb ansawdd : cost o 70:30 ei mabwysiadu ar gyfer penodi yn unol ag arweiniad a gyhoeddwyd.

08.2 Bydd dyfynbrisiau yn cael eu sgorio ar sail:

08.2.1 Profiad blaenorol perthnasol (Sgôr 20)

08.2.2 Dealltwriaeth o'r briff ac o faes addysg (20)

08.2.3 Y cynllun a'r dull gweithredu (20)

08.2.4 Manylion tîm yr astudiaeth, gan gynnwys eu cefndir (10)

08.2.5 Gwerth am arian (30)

08.3 Bydd yr ymgymrwyr a fydd yn cyrraedd y rhestr fer yn cael eu gwahodd i roi cyflwyniad byr ynghylch eu dull gweithredu ar gyfer yr astudiaeth. Disgwylir y bydd y cyfarfod cychwynnol gyda'r ymgeisydd llwyddiannus yn cael ei gynnal yn yr wythnos yn cychwyn X Mawrth 2018 eto ar amser ac mewn lleoliad sydd i'w drefnu.

08.4 Cadarnheir yr apwyntiad drwy gyfnewid gohebiaeth.

08.5 Bydd y ffioedd yn cael eu talu fesul cam ar y sail ganlynol:

- 25% o'r ffi y cytunwyd arni ar ôl penodi wrth gadarnhau cynllun prosiect y cytunir arno
- 50% o'r ffi y cytunwyd arni ar ôl cwblhau fersiwn drafft boddhaol o'r astudiaeth.
- Bydd y 25% sy'n weddill yn cael ei dalu ar ôl cwblhau ac anfon fersiwn terfynol yr astudiaeth ar yr amod bod y cleient yn fodlon fod yr holl wasanaethau y gofynnwyd amdanynt wedi eu cyflawni'n foddhaol.

## 09 Telerau ac amodau

09.1 *Hawlfraint:*

Bydd y grŵp cleient yn cadw'r hawlfraint ar gyfer yr holl ddeunyddiau sy'n ymwneud â'r astudiaeth ac yn cadw'r hawl i atgynhyrchu'r astudiaeth, yn rhannol

neu yn ei chyfanrwydd, ar ôl cyhoeddi. Bydd y grŵp cleient yn cadw'r hawl i lunio casgliadau annibynnol ei hun o'r astudiaeth neu'r deunyddiau a gasglwyd neu a gynhyrchwyd. Bydd y grŵp cleient yn cydnabod yr ymgynghorydd os caiff y deunydd ei gyhoeddi.

Disgwylir i'r ymgynghorwr gyflwyno i'r client unrhyw ddeunydd holiaduron neu arolwg sydd wedi ei ddefnyddio ar gyfer ymateb i'r briff.

#### 09.2 *Indemniad:*

Un o'r amodau penodi yw y bydd yr ymgynghorwyr yn indemnio'r cleient yn erbyn unrhyw hawliadau a fydd yn deillio o'r comisiwn, boed hynny drwy esgeulustod neu fel arall. Dylid cadarnhau bod gan yr unigolyn neu'r sefydliad a benodir yswiriant indemniad proffesiynol hyd at o leiaf £1 miliwn neu dylid darparu tystiolaeth gan yswiriwr cydnabyddedig y byddech yn cael eich derbyn ar gyfer yswiriant o'r fath petai ofyn.

#### 09.3 *Gwrthdaro rhwng buddiannau:*

Er mwyn diogelu materion posibl sy'n ymwneud â sensitifrwydd masnachol, rhaid i ymgeiswyr ddatgelu unrhyw fuddiannau neu gomisiynau perthnasol, a allai effeithio ar gynnal yr astudiaeth arfaethedig.

#### 09.4 *Newidiadau i dîm yr astudiaeth:*

Dim ond y staff allweddol a enwebir yn y dyfynbris a gyflwynir a gaiff weithio ar yr astudiaeth heb gymeradwyaeth ysgrifenedig ymlaen llaw gan y cleient. Gall methu cydymffurfio â'r gofyniad hwn olygu bod y contract yn ddi-rym.

#### 09.5 *Terfynu penodiad:*

Mae'r cleient yn cadw'r hawl i derfynu'r penodiad unrhyw bryd ar ôl talu'r holl ffioedd a'r costau a gafwyd hyd at ddyddiad y terfynu.

#### 09.6 *Cydymffurfio â pholisïau Cyngor Gwynedd:*

Gofynnir i'r unigolyn neu'r sefydliad a benodir weithredu yn unol â pholisïau perthnasol Cyngor Gwynedd wrth gyflawni'r briff hwn, gan gynnwys yn benodol (mae copïau ar gael ar gais):

- Polisi Iaith Cyngor Gwynedd
- Polisi Cydraddoldeb Cyngor Gwynedd
- Polisi Iechyd, Diogelwch a Lles Cyngor Gwynedd

Caiff yr ymgeiswyr eu hatgoffa hefyd bod Cyngor Gwynedd yn rhwym wrth ddarpariaethau Deddf Rhyddid Gwybodaeth 2000 a Deddf Diogelu Data 1998.

## 10 Rhagor o wybodaeth

10.1 Os oes gennych chi ymholiadau sy'n ymwneud â chynnwys cyffredinol y briff hwn, dylech eu hanfon at :

Garem Jackson  
Pennaeth Addysg Gwynedd  
Cyngor Gwynedd  
Swyddfeydd y Cyngor  
CAERNARFON  
LL55 1SH  
Ffôn: 01286 6792089  
E-bost: [garemjackson@gwynedd.llyw.cymru](mailto:garemjackson@gwynedd.llyw.cymru)

DRAFT